



Gid Sitwayen pour SANZMAN KLIMA



dan SeSel



©Sustainability for Seychelles, 2020.



SEYCHELLES CONSERVATION
AND CLIMATE ADAPTATION
TRUST

SeyCCAT

Remersiman:

Sa pti livre in ganny prodwir apartir siport finansyel avek Linyon Eropeen/Lalyans Sanzman Klima Global, (Global Climate Change Alliance), Gouvernman Sesel e Fon Adaptasyon. Konservasyon Sesel e Fon Adaptasyon Klima)Seychelles Conservation and Climate Adaptation Trust (SeyCCAT)) pou zot sipor pou sa nouvo re-enprimen (2020).

Remersiman spesyal i al pour bann manm Soutenabilite pour Sesel ki ti angaze dan plizyer staz prodksyon, avek mansyon spesyal pour: Rosetta Alcindor (resers e konpilasyon) Michel Martin (konpilasyon e edite) Aimé Claude Sakufi (mizanpaz ek konsepsyon grafik) e Jacques Harter (ilistrasyon ek portre) Allen Gervais Comettant (edite), e Charlotte Tagart (koreksyon teks). Soutenabilite pour Sesel i annan drwaloter lo tou portre amwen ki in ganny spesifye otreman.

LATAB KONTENI

LENTRODIKSYON 2

PARTI A -LENFORMASYON LO SANZMAN KLIMA 3

Kisisa sanzman klima	3
Lakoz sanzman klima	4
Sours global gaz efedser	5
Lenpak sanzman klima lo nou plannet	6
Ki mannyer sanzman klima pou afekte Sesel?	7
Lenpak sanzman klima lo lavi dan Sesel	8
Aksyon global klima- Lakor Pari	10

PARTI B - REDWIR NOU LANPRENT KARBONN 11

Ki mannyer mon kapab redwir mon lanprent karbonn?	12
Redwir lanprent karbonn Sesel	15
Rol sisyete sivil dan aksyon klima	16
Lalit bann Lorganizasyon Non Gouvernmantal Enternasyonal pour sanzman klima	17

PARTI C- PREPARASYON POUR SANZMAN KLIMA 18

Adapte avek sanzman klima	19
Azanda ladaptasyon sanzman klima	21
Ki mannyer ou kapab protez ou biznes kont sanzman klima?	22
Sisyete Sivil e ladaptasyon sanzman klima	23
Adaptasyon kot lakour – Ki nou kapab fer?	24
Teknolozi pour proteksyon kont sanzman klima– semen pour lavenir	26

RESOURS EK PLIS LEKTIR 28

Bann sitweb enternasyonal itil	28
Dokiman itil	28
Lorganizasyon	29

LENTRODIKSYON

Koman en pti leta zil, Sesel i ekstrememan konsernen avek sanzman klima. Prediksyon dan logmantasyon nivo lanmer, logmantasyon dan tanperatir ler ek lanmer, akselerasyon lerozyon lakot: tousala i bann size serye ki pou afekte nou enormeman dan bann lannen a venir. I responsabilite sak sitwayen pour ede dan ralantisman sanzman klima. Sakenn de nou i devret ede dan prosesis preparasyon e adaptasyon avek bann sanzman avan ki sa i andomaz nou lenfrastruktir ek nou moyen legzistans.

Sa pti livre in ganny prozekte koman en pwen depar pour dimoun dan Sesel ensi ki dan lezot bann pti zil dan tropik ki swete enform zot lekor lo sanzman klima e kwa ki nou kapab fer konsernan sa. Sa livre i versyon amande en gid sitwayen presedan lo sanzman klima orizinalman pibliye par Soutenabilite pour Sesel an 2012.

Sa livre i annan plizer lobzektif:

1. Ogmant konprenezon bann lekter lo sanzman klima e son bann lenplikasyon pour Sesel e lezot pti leta zil.

2. Fer resorti vilnerabilite environmantal, ekonomik e sekter sosyal e dekrir serten mezir ki pe ganny pran pour adapte avek sanzman klima.

3. Enspir dimoun pour pran aksyon, kot lakour, dan zot kominate e dan landrwa travay.

Sa livre i divize an plizer parti :
Parti A – i kouver lenformasyon konsernan bann lakoz e lenpak sanzman klima.

Parti B – i adres bann stratezi pour redwir nou lanprent karbonn e ralanti sanzman klima.

Part C – i dekrir aksyon ki nou kapab pran pour adapte avek sanzman klima ki pe deza arive e bann aksyon ki pou ed nou minimiz domaz avek nou lenfrastruktir e moyen legzistans pour lefitir.



PARTI A – LENFORMASYON LO SANZMAN KLIMA

KISISA SANZMAN KLIMA?


Komite Entergouvernmantal lo Sanzman Klima (IPCC), en group ki pe ganny dirize par syantis internasyonal pour klima, in fer resorti ki san okenn dout, klima Later pe sanze an rezulta aktivite imen lo sa plannet: latmosfer ek bann losean pe vin pli so, nivo lanmer pe ogmante, e letan pe vin pli ekstrem. Se sa ki nou konnen koman 'Sanzman Klima'.

Pandan tou parkour listwar later, sanzman klima in arive plizyer fwa an rezulta bann faktor naturel. Sepandan, sa ki nou pe eksperyanse aktyelman i enkonstableman koze par aktivite imen, ki pe ogmant proporsyon dyoksid karbonn e lezot kemikal ki gard lasaler dan latmosfer later dan en fason drastik. Sa komite syantis (IPCCS) i predir ki bann pti zil parey Sesel pour ganny afekte direkteman, sirtou dan bann landrwa ba lo lakot. Menm si sanzman klima i enkyetan, bon nouvel se ki i

ankor annan en kantite nou kapab fer pour ralantir li, e nou osi kapab planifye a lavans e prepar nou pour serter sa bann sanzman ki pe vini.

Sanzman klima i koze par resofman mondal. Sa resofman i arive atraver en prosesis apele "Lefe gaz efedser", kot en kous gaz naturel dan latmosfer i azir koman en efedser, an gard lasaler soley pros avek later, e an sofan ler ek lanmer, ki fer li posib pour lavi epanouir lo nou plannet. Sa i en prosesis naturel, me avek bokou plis "gaz efedser" ki pe antre dan latmosfer an rezulta aktivite imen, later pe sofe deplizanpli, son rezulta final i sanzman klima - koze

par imen.



BANN LAKOZ SANZMAN KLIMA

Gaz efedser (GHGs) i bann gaz ki gard lasaler dan latmosfer later. Zot azir parey en blennket, ki anpes lasaler soley rebondir lo sifas later e retourne dan lespas. Sa i en prosesis naturel, e i ede gard later sifizaman so pour ki lavi i egziste, me la i pe al andeor kontrol akoz aktivite imen. La bann legzanp prensipal gaz efedser (GHGs) :


Dyoksid Karbonn (CO₂) : En gaz efedser naturel ki form parti sa sikl karbonn e ki ede pour plant pouse. Bokou plis dyoksid karbonn (CO₂) pe antre dan latmosfer an rezulta aktivite imen : fosil konbistib ki pe ganny brile, bann dife lafore, e prodkyon siman, e sa i enn bann kontribiter prensipal pour resofman global. I gard lasaler pour de santenn lannen.

Metann (CH₄) : Sa i en gaz efedser naturel ki sorti dan bann lorganizm pouri, me ki pe ogmante akoz prodkyon betay, bann rizer e konblaz pour salte. I trant fwa pli pwisan pour gard lasaler ki dyoksid karbonn (CO₂).

Oksid Azot (N₂O) : En gaz efedser naturel, ki form parti sikl nitrozenn later, me ki osi pe ogmante an rezulta fosil konbistib ki pe ganny brile, e prodkyon langre pour lagrikiltir. I apepre trwa san fwa pli pwisan ki dyoksid karbonn (CO₂).

Gaz Flourin : Sa bann konponan i ganny fabrike par imen e zot ganny servi dan bann lendistri e refrizerasyon e zot en milyon fwa pli pwisan ki dyoksid karbonn (CO₂) pour gard lasaler. Enn sa bann gaz pli komen i idrokloroflouro karbonn (HCFC) ki malgre i prezerv kous ozonn pli byen ki kloroflouro karbonn (CFCs) i en gaz efedser vreman problematik.

Lavaper Delo (H₂O) : i gaz efedser naturel, me an mezir ki latmosfer i sofe, plis lavaper delo i ganny retenir, sa i ogmant son kontribisyon dan resofman global.




Percentage of GHGs in the Atmosphere

Sours : <https://www.epa.gov/ghgemissions/>


SOURS GLOBAL GAZ EDEDSE

Komite Entergouvernmantal lo Sanzman Klima (IPCC), atraver sekter ekonomik, pe sirvey de pre sours gaz efedser globalman. Pli gro founiser gaz efedser i prodiksyon lasaler ek elektrisite, swivi par lagrikiltir endistriyel e lezot sanzman lo later (tel ki dife), swivi par bann lendistri ki enkli tou bann emision ki ganny prodwir pandan fabrikasyon bann prodwir, e apartir bann restan salte. Lefet ki nou konnen kote sours bann emision i ete, sa i donn nou en bon lide kote nou pou fokaliz nou zefor pour redwir emision.



LENPAK SANZMAN KLIMAN LO NOU PLANNET

Si nou pa pran aksyon pour ralantir sanzman klima, e nou kontinyen azout gaz efedser dan latmosfer, i pou kontinyen sofe e pou annan konsekans grav pour nou plannet, son pep e bann lekosistenn. Sa desen i donn serten prediksyon depandan lo ki kantite later pou sofe.



KI MANNYER SANZMAN KLIMA POU AFEKTE SESEL?

Lotorite Meteolozi Sesel in kolekte statistik lo tanperatir, degre lapli e logmantasyon nivo lanmer, e i'n predir bann senaryo probab pour Sesel pour bann lannen 2080–2100.

Logmantasyon Tanperatir

Rikord i montre ki dan Sesel, depi 1972 tanperatir mwayenn in ogmant a en to aepre 02 degre santigrad par an, e ki tanperatir lannwit pe ogmant en pti pe pli vit ki tanperatir lazournen. Sa tandans i ekspekte kontinyen e sofman tanperatir ler i osi afekte tanperatir lanmer, ki met presyon lo resif koray ki sansib avek logmantasyon tanperatir. Sesel in deza annan plizyer epizod serye blansisaz koray e i'n perdi aepre 97 poursan (97%) bann resif koray an bonn sante, ki'n fer ki bann lakot in vin pli vilnerab a lerozyon, e lendistri lapes artizanal in bese.



Sanzman dan degre Lapli

Mouson sides, ki sezon sek dan Sesel, i komans depi Me ziska Septanm, me dapre bann prediksyon, i kapab vin pli mouye, e sa i ava kapab redwir en pe problem distribisyon delo. Sepandan, pandan sezon lapli, ki depi Novanm ziska Mars, bann prediksyon i endike ki nou pou menm kapab ganny plis lapli, ki kapab koz problem inondasyon ek deboulir later si en gran kantite lapli i tonbe dan en pti lespas letan.

Ogmantasyon Nivo Lanmer

Mwayenn global pour ogmantasyon nivo lanmer in ganny estimen a en vites 3.2 milimet par an. Sepandan, i annan bann sanzman minim dan differan parti lemonn. To akyel mwayenn ogmantasyon nivo lanmer otour Sesel i 3 milimet par an, me sa i kapab ogmante depandan lo kwa ki arive dan lezot parti lemonn, par egzanp fonnman bann glasye. Senaryo pli pir ki'n predir pour Sesel, i ogmantasyon 1 met oter dan nivo lanmer ver lannen 2100 – ki pou sanz nou bordaz lakot, tou bann lenfrastriktir e devlopman lo lakot dan en fason dramatik.

LENPAK SANZMAN KLIMA LO LAVI DAN SESEL

Sanzman klima pour annan en lenpak lo diferan laspe lavi dan Sesel. Vwala enn de legzant:

Lagrikiltir

- Prodwi agrikol pou pli ganny menase par zensek ek plant anvaisan an mezir ki tanperatir i ogmante.
- Developman prodwi agrikol i kapab ganny afekte par sanzman dan tanperatir e lakantite lapli ki tonbe, ouswa gro divan e gro lapli.
- Prodwi agrikol ki rezistan avek lasesres, maladi e bann plant ki pa ganny afekte avek delo sale pou pouz pli byen ki lezot ki ganny afekte.
- Bann betay i kapab ganny afekte avek logmantasyon tanperatir.



Lenfrastriktir Lakot

- 90% nou aktivite ekonomik ek letablisman i trouve lo lakot, e parey lezot pti leta zil, nou mwayen legzistans i depan enormeman lo bann resours lakot.
- Lerozyon dan logmantasyon nivo lanmer e tanpet i kapab okazyonn domaz avek semen e lezot lenfrastriktir esansyel tel ki elektrisite ek provizyon delo, stokaz manze, bann lotel...
- Inondasyon an rezulta gro lapli i osi kapab okazyonn domaz avek bann semen, pon ek batiman, enkli nou bann lakaz.



SeKirite Delo

- Anmezir ki nivo lanmer i ogmante, delo sale i kapab penetre dan delodou anba later ki ganny servi pour lagrikiltir dan bokou landrwa dan Sesel.
- Sanzman dan lakantite lapli ki tonbe, dan tanperatir, dan nivo evaporasyon e dan kalite delo pou afekte bann resours delo.



• **Lasante Imen**

- Leptospiroz i relye avek varyabilite klima e letan sezonyer; Sesel i deza annan en to pli eleve konpare avek lezot pti leta zil.
- Bann maladi ki nou gannyen atraver moustik i kapab ogmante avek logmantasyon lapli ek delo ki reste dan en sel plas.



• **Lekonomi**

- Apre en dezas naturel, kou pour rekonstrir i kapab reprezent en poursantaz o pour Prodwi Enteryer Brit (GDP). Sa lensidan inondasyon Pwent Lari an 2013 ti ganny estimen pour kout 100 milyon rouspi pour rekonstriksyon.
- Sikse lekonomi Sesel i vedir ki probabilité pour Sesel resevwar sibvansyon pour rekonstriksyon ek restorasyon i tre ba.
- Tourizm ek plonzer pou ganny afekte par bann lans ek resif koray ki pou ganny detrir an rezulta lerozyon.
- Lapes, migrasyon ton ki pou enprevizib, pou ganny afekte an rezulta destriksyon resif koray e sanzman dan kouran losean e tanperatir lanmer respektivman.



• **Biodiversité**

- Koray i sansib a logmantasyon tanperatir e blansisaz letan zot strese, e sa i kapab koz lanmor evantyelman. Sa i destabiliz balans resif koray annantye, kot lezot zannimo i depan lo koray pour nouririr e labri.
- Labita naturel pour plant ek zannimo i kapab ganny detrir par inondasyon soudan e lezot levennman letan ekstrem.
- Nou bann lespes andemik e natif i vilnerab kont lespes anvaisan e sanzman dan kondisyon letan.



kredi: NOAA

AKSYON GLOBAL KLIMA – LAKOR PARI

An 2015, bann lider lemonn ti zwenn Pari pour tonm lo en lakor lo kwa ki fodre fer konsernan sanzman klima, an term redwir gaz efedser e osi pour ed bann pei e rezyon vilnerab pour fer fas avek bann lenpak e redwir zot vilnerabilite. Sa lagreman ki zot ti sinyen i apel Lakor Pari e i enkli sa bann komitman swivan:

Mitigasyon: Redwir Emisyon Gaz Efedser

- Bann lider lemonn ti agree pour limit logmantasyon dan tanperatir global a 1.5 degré santigrad pour redwir lenpak sanzman klima.
- Tou pei, ris ouswa pov, ti agree pour servi bann pli bon teknik e teknolozi disponib pour redwir zot emisyon karbonn.

Adaptasyon: Fer fas avek bann lenpak

- Bann pei ti fer komitman pour redwir vilnerabilite a bann lenpak sanzman klima e pour amelyor rezilyans, espesyalman pour bann nasyon ki mwayen reveni i ba, ki'n ganny e pou ganny plis afekte.

KI SESEL IN ANGAZ LI POUR FER ?

Sesel i en pti pei avek en pti popilasyon, parey en kantite pti leta zil ki pe devlope, donk nou kontribisyon pour sanzman klima lo nivo global i minimal. Sepandan, lo en baz endividuel, nou lenpak i konparab avek sa ki pour dimoun ki pe viv dan bann pei Eropeen. Ant 1990 e 2015, nou bann emisyon in ogmante sorti 2.66 pour vin 5.38 tonn dyoksid karbonn (CO₂) par dimoun!

Pari, nou gouvernan ti fer langazman pour redwir nou emisyon gaz efedser par 15% par lannen 2030. Depi sa, zot in reviz sa nom e nou target i kapab ogmant ankor plis. Nou'n promet pour redwir nou emisyon prensipalman an targetan sa de sekter prensipal ki kontribye anver o nivo dyoksid karbonn (CO₂): transportasyon ek lenerzi.

Sa i vedir ki nou bezwen fer nou bann transpor biblik vin pli ekolozik e osi revwar lezot fason pour redwir emisyon par loto, par egzanp bouz lo loto ibrid e elektrik (ki servi lenerzi soler), e ankouraz plis dimoun pour marse e servi bisiklet. Nou'n osi promet pour travay pour redwir depandans lo elektrisite ki servi fosil konbistib e plito al ver lenerzi renouvlab, espesyalman pano soler voltaik, me osi rod fason pour zener elektrisite apartir salte e an menm tan redwir emisyon metann. Laplipar gaz efedser ki nou prodwir i ganny abzorbe par bann lafore ek losean.

An term adaptasyon sanzman klima, nou fer langazman pour amelyor nou lasante, lagrikiltir, proteksyon lakot e met an plas en sistem dezas pour asire ki zot konform avek okenn levantyalite an sa ki konsern sanzman klima, e investir plis dan resers dan fason pour ed nou aprann ki mannyer pour vin pli rezilyan.



kredi: www.un.org

PARTI B – REDWIR NOU LANPRENT KARBON

“Lanpent Karbonn” i en term ki servi pour dekrir lakantite dyoksid karbonn e lezot gaz efedser ki large dan latmosfer an rezulta konsonmasyon labita en dimoun partikilye, group ouswa pei. Par egzanp, dimoun ki annan en lavi odegann (leg. ki manz bokou lavyann, ki dray loto, ki voyaz par avyon, ki servi bokou elektrisite ek delo, e ki aste bokou komodite enporte ki sorti lwen), i annan tandans pour annan en lanpent karbonn pli o ki pour dimoun ki viv en lavi senp ouswa ki mwen fortinen.



KI MANNYER MON KAPAB REDWIR MON LANPWENT KARBONN ?



Sel fason nou kapab ralentir sanzman klima lo plannet later se pour redwir nou emisyon gaz efedser. An dot mo, nou bezwen redwir nou lanpwent karbonn.

Sa i kapab fer dan bann lakour endividylel, dan bann lorganizasyon, lo nivo nasjonal e enternasjonal. Aksyon ki bezwen se senpleman pour konpran, me fer zefor pour met an pratik, espesyalman lo en gran lanpler. Vwala enn de lide ou kapab eseye kot lakour, kot lekol ouswa dan travay :

Elektrisite

- Redwir nou konsonmasyon elektrisite par et pridan pour pa fer gaspiyaz, e pour servi teknolozi inovativ e efikas ki fer menm travay me ki servi mwens elektrisite (leg. laparey ek glob lenerzi soler).
- Bouz lo resours lenerzi renouvlab (lwen avek fosil konbistib)

LENERZI – KI OU KAPAB FER:

- Tenny lalimyer ek bann laparey ler ou pa pe servi
- Si ou servi klimatizer met li lo 26 C
- Bouz lo glob LED e prezerv 90% lo kou lenerzi lalimyer.
- Ler ou bezwen ou frizider ek masin lave, envestir dan mark ki prezerv lenerzi
- Enstal pano soler voltaik lo ou twa.
- Fer piblisite pour plis linvestisman dan lenerzi renouvlab

Transportasyon

- Fer transpor publik vin pli efikas, pli pratik e pli konvivyal.
- Bouz lo mwayer transpor pli soutenab : veikil ibrid e elektrik ki servi lenerzi renouvlab.
- Marse e servi bisiklet, e konsevar plis semen ek sante pour dimoun plito ki pour loto.

TRANSPORTASYON – KI OU KAPAB FER:

- ✓ Pran bis ouswa mont bisiklet
- ✓ Mars bann distans kourt (i bon pour ou lasante)
- ✓ Motiv ou bann apliwaye pour pran bis, marse ouswa mont bisiklet
- ✓ Envestir dan en pti loto ibrid, ouswa en loto elektrik ki servi pano soler voltaik
- ✓ Fer piblisite pour plis sekirite pour pyeton ek siklis.



Delo

- PUC i bezwen en kantite lenerzi pour kolekte, trete e ponp delo pour anmenn kot nou lakour e kot nou biznes. Nou kapab redwir konsonmasyon delo par et pridan pour pa fer gaspiyaz, e servi bann laparey efikas ki servi mwens delo tout an donnan menm rezulta (leg. masin lave ki servi lenerzi ek delo dan en fason efikas).
- Napa okenn nesesite pour servi delo trete pour kabinen, pour lave, pour aroz zarden e lezot landrwa kan larivyer ki pa trete ouswa delo lapli i kapab ganny servi. Ranmas e servi delo lapli i en bon fason pour servi mwens delo PUC dan lakour e dan travay.
- An fezan sir ki bann tiyo i dan bon kondisyon i osi redwir gaspiyaz delo - dan nou lakour, dan biznes, ensi ki dan sistem PUC.
- Dan serten ka, delo ki'n deza ganny servi (dan sink ouswa lasanmben) i kapab reganny servi pour aroz zarden. Serten lotel i fer sa, me tret sa delo avan.
- Dan serten pei zot reservi delo prop ki sorti dan tretman desarz dan lagrikiltir ouswa dan amenazman peizaz, e sa i osi kapab ganny fer dan Sesel.



DELO- KI OU KAPAB FER:

- ✓ Ferm tiyo letan ou pe lav zafer ouswa bros ledan
- ✓ Pran ben pli kourt (4 minit)
- ✓ Bouz lo lenstalasyon delo pli efikas tel ki dous e kabinen
- ✓ Servi masin lave 'front load'
- ✓ Enstal en tenk pour anmas delo lapli e servi sa delo pour aroz zarden, lav loto ouswa lezot litilizasyon deor
- ✓ Tyeke e aranz tiyo koule e enform PUC lo okenn tiyo kase.

Manze

- Manze lokal i tre bon pour ou lanpwent karbonn, pour ou lasante e pour lekonomi lokal.
- Manze lokal pa bezwen voyaz gran zistans sorti dan plantasyon ouswa losean pour ariv dan ou lasyet. Sak kilomet ki sa manze in voyaze i vedir plis lanpwent karbonn, e bokou plis ankor si sa manze pe voyaz par avyon ouswa dan konntener klimatize.
- Manze ki'n ganny prodwir dan ou prop zarden, ki swa fri, legim, bred mouroum, ouswa poul, i annan bokou mwens lanpwent karbonn, deplis ou annan kontrol total pour kontrol pest e move zerb an servan metod naturel ki son nivo karbonn i ba.
- Serten fermye lokal pe komans envestir dan pano soler voltaik, dan teknolozi lenerzi ek delo ki efikas pour redwir zot kou me sa i osi vedir ki sa manze ki pe ganny prodwir i annan en lanpwent karbonn ki ba.
- Bann pti fermye i rarman servi okenn elektrisite ouswa teknolozi - esey aste lo laferm si ou kapab!

MANZE- KI OU KAPAB FER:

- ✓ Esey prodwir ou prop manze. Rod konsey avek en fermye ouswa vvazen si ou bezwen led
- ✓ Plant en pe legim dan konntener
- ✓ Fer letan pour al bazar, laferm ouswa kot bann kyosk o bor semen – ou pa toultan posib pour ganny manze lokal dan en laboutik
- ✓ Aste lavyann ek pwason lokal
- ✓ Esey pa manz lavyann, menm si i zis pour de ou trwa zour par semenn

Salte

- Preski tou keksoz nou aste ouswa servi i annan son prop lanpwent karbonn – en bon pe lenerzi i al dan fabrikasyon, prodiksyon e transportasyon sa bann prodwir ziska kot ou. Donk - pli ou aste mwens, pli ou lanpwent karbonn i ba.
- Laplipar prodwir i evantyelman ganny zete, e i probableman al fini dan landrwa kot i zet salte. Landrwa zet salte i sours pour metann ek lezot gaz efedser.
- Redwir salte e reservi bann keksoz ki'n deza ganny servi, i mwayen pli bon pour redwir ou lanpwent karbonn. Resiklaz i pran en kantite lenerzi dan transformasyon e transportasyon, donk sa i dernyen opsyon.
- Plastik i pran en gran kantite letan lenerzi pour prodwi e zot tre polyan enn fwa zot ganny zete, donk alternativ pour reservi ouswa biodegradab i pli bon opsyon pour nou klima.
- Salte i kapab ganny servi pour zener elektrisite, legzanp en gran lesel biodizestif i kapab bril salte ekolozik sorti Sesel e metann ki i prodwi, i kapab ganny servi pour zener elektrisite. Sa metann i ava ganny transformen an dyoksid karbonn (CO₂), an retour sa ava fer li vin en gaz efedser mwen pwisan.



Lwazir

Sa ki nou swazir pour fer dan nou letan lib i annan en lenpak lo nou lanpwent karbonn. La enn de legzanp bann aktivite Iwazir. An gro, bann Iwazir ki enplik veikil avek masin e fosil konbistib i annan en pli gran lenpak.



LWAZIR KI BON POUR OU LANPRENT KARBONN	LWAZIR KI PA BON POUR OU LANPRENT KARBONN
<ul style="list-style-type: none">✓ Siklizm (mont bisiklet)✓ Marse✓ Vizit zanmi✓ Zardinaz✓ Pran bis pour vizit zil✓ Al lo lans pre avek ou lakaz✓ Zwe domino✓ Fer plans awval, kayak, navigé✓ Sketbording, patinaz✓ Naze✓ Aktivite sportif kot ou kapab ale an marsan ouswa par bis : volibol, basketbol, karate, danse✓ Aktivite artizanal an servan prodwi lokal	<ul style="list-style-type: none">✗ Dyetski✗ Promnad dan ou loto ouswa lo ou moter✗ Karting✗ Fer lakours dan en spidbot✗ Zwe video ouswa get televizyon (amwen ki ou servi en lekran plat)✗ Kwi manze ouswa fer gato an servan zengredyen enporte✗ Kwi manze an servan bokou lavyann✗ Pran avyon pour voyaz a letranze✗ Fer laranzman fler ouswa lezot travay artizanal an servan fler ouswa materyo enporte

REDWIR LANPRENT KARBONN SESEL

Sesel i prodwir 5.38 tonn dyoksid karbonn (CO₂) an mwayenn par personn anyelman, e sa pe kontinyelman ogmante sak lannen! Sa i pli o ki mwayenn mondial ki 4.9 tonn par personn e i lo menm nivo avek bann pei pli ris tel ki Lespanny, Lafrans e Portigal. Laplipar bann emisyon dyoksid karbonn (CO₂), (apepre 38 %) i sorti dan sekter elektrisite ek transpor menm si metann dan landrwa zet salte i osi kontribye. Koman en pti leta zil, Sesel i larg selman en pti fraksyon (apepre .003%) emisyon gaz efedser mondial, me lo en baz endividylel, nou emisyon i o.

Menm si nou bezwen fer nou bout lo en baz endividylel osi, koman en pei, Sesel i devret kontinyelman travay lo nou stratezi pour redwir nou kontribisyón dan emisyon gaz efedser global. Sa i enkli:

Bouz lo Lenerzi Renouvlab

- ✓ Lelis divan i form parti sa plan, e donk sa i en komansman e lankourazman pour bann lakaz, lakonpannyen e batiman gouvernman pour enstal pano soler voltaik. Gouvernman pe osi get dan posibilite kree en stasyon tretman lenerzi salte pour anmas metann e prodwir elektrisite.
- ✓ Sa griy (rezo bann laliny elektrisite dan pei) pe ganny amelyore par PUC pour ed li fer fas avek sa logmantasyon dan lenerzi ki an rezulta kontribisyón lenerzi divan ek soley.
- ✓ Gouvernman i annan plan pour ogmant lenvestisman dan lenerzi renouvlab par sekter prive.
- ✓ Nou pou bezwen batri lo en gran lesel pour gard pwisans soler ki ganny prodwir lizour e ganny servi aswar - sa i en teknolozi ki merit ganny sirveye...

Promouwar Lefikasite Lenerzi

- ✓ Lòn SEEREP i en fason ekselan pour ganny larzan pour investir dan panosoler voltaik, ouswa novo laparey lenerzi efikas pour ou lakour ouswa biznes. Ou kapab fer ou demann kot laplipar bann labank komersyal, e ganny plis lenformasyon

lo sitweb www.sec.sc.

- ✓ Gouvernman Sesel pe bouz ver en sistèm etiket pour tou bann laparey lenerzi efikas, pour fer li pli fasil pour konsomater pour fer sa pli bon swa.
- ✓ An metan an plas standar pour lefikasite lenerzi, Gouvernman Sesel pou kapab kontrol lenportasyon bann laparey ki pa efikas e ki pa de kalite.

Promouwar mwayen transpor ekolozik

- ✓ Rediksyon taks i deza an plas pour ankouraz lenvestisman dan ibrid, loto elektrik e bisiklet.
- ✓ SPTC pe etidye bann stratezi pour fer son laflot transpor vin pli ekolozik: bokou pei in deza bouze e pe servi transpor ekolozik ouswa bis elektrik.

Promouwar Manze Lokal

- ✓ Minister Lagrikiltir ek Lapes in deza met an plas bann programm pour siport fermey e peser lokal e ed zot ogmant prodiksyon, soutenabilite.



ROL SOSYETE SIVIL DAN BANN AKSYON KLIMA

Sesel i annan en kominote sosyete civil prospere – sa i enkli bann lorganizasyon non gouvernmantal (NGOs), bann lasosyasyon, medya e bann lorganizasyon kominoter (CBOs). Bokou sa bann group pe osi esey promouvwar en stil lavi kot nivo karbonn i ba e pe pran bann mezir ek aksyon pour adres sanzman klima. Akoz ou pa zwenn enn sa bann group?

Par egzanp :

Soutenabilite pour Sesel

Sa lorganizasyon non gouvernmantal (NGO) in tre aktif dan bann aksyon ek ledikasyon sanzman klima depi 2008.

Soutenabilite pour Sesel (S4S) in

prodwir plizyer resours lansennyman lo sanzman klima (sa i disponib lo sit web www.s4seychelles.com) e zot in fer plizyer latelye pour bann etidyan e profesyonnel pour ed zot rod mwayen pour pran aksyon e azir lo sanzman klima.

Soutenabilite pour Sesel (S4S) in osi organiz plizyer demonstrasyon ek rali an kolaborasyon avek bann platform internasional pour sanzman klima tel ki 350.org e AVAAZ, ki enkli rali Mont bisiklet pour nou Plannet an kolaborasyon avek Lasosyasyon Bisiklet Sesel. An 2016, Soutenabilite pour Sesel (S4S) ti donn tou lekol primer ek segonder en bwat pano soler voltaik pour ankouraz lansennyman ek laprantisaz lo lenerzi renouvlab dan laklas.



SYAH- SESEL

Sa Lorganizasyon Non Gouvernmantal (NGO) lazenes lokal in travay dir pour angaz bann zanfan ek bann zenn dan lakoz sanzman klima, e zot in organiz plizyer latelye ek bann lezot aktivite pour ed bann zenn aprann plis lo kwa ki zot kapab fer. Zot osi debat for pour ki bann zenn i ganny enkli dan bann konferans ek levennman enternasional lo sanzman klima.



Bann Klib 'Wildlife' Sesel

Sesel i annan en rezo klib "widelife" dan bann lekol atraver pei. Sa bann klib i ed zot lekol avek bann proze pour redwir



konsonmasyon lenerzi ek delo, e promouvwar bann stil lavi soutenab pour redwir lanprent karbonn. Sa bann klib i travay kotakot avek programm lekol Eko dan zot lekol.


Bann lezot Lorganizasyon Non Gouvernmantal (NGO) tel ki **Nature Seychelles, Sosyete Konservasyon Lamarin Sesel, Wise Oceans, GVI e Proze Losean** i annan en varyete linisyativ environmantal tel ki ede pour etidye e restor bann resif koralyenn. Zot travay an partenarya avek bann donater enternasional, gouvernman osi byen ki bann partener prive tel ki lotel.

Rol Medya

Sesel i sanse pour annan en gran rezo medya ek zournalisti pasyonnen pour kominik bann size konsernan sanzman klima avek publik. Serten bann medya endependan tel ki Lazans Nouvel Sesel (Seychelles News Agency) i poste zot bann lartik anliny, e sa i disponib gratwitman.

Bann Lorganizasyon Non Gouvernmantal (NGO) enternasyonal ki pe lalit pour Sanzman Klima

350.org i enn parmi bann Lorganizasyon Non Gouvernmantal (NGO) enternasyonal pli prominan ki pe travay pour lit kont sanzman klima. Sa i en platform ki anliny, i kordin bann aksyon lokal lo en lesel global. Sesel in partisip dan plizer zot bann kanpanny (kordinen lokalman par Soutenabilite pour Sesel (S4S) me nenport ki i kapab al anliny pour siny enn zot bann petisyon, ouswa organiz en levensnman dan zot rezyon.



Plizer lezot Lorganizasyon Non Gouvernmantal (NGO) enternasyonal i osi annan bann kanpanny sanzman klima, tel ki :

Fon mondal pour Lanatir (Worldwide Fund for Nature) WWF
(http://wwf.panda.org/whta_we_do/footprint/climate_carbon-energy/)

Linyon Enternasyonal pour Konservasyon Lanatir (International Union for the Conservation of Nature) IUCN
(<https://www.iucn.org/theme/climate-change/>)

Greenpeace (<http://www.greenpeace.org/international/en/campaigns/climate-change/>)

Avaaz –platform aktivis anliny ki souvan kolabor avek350.org otour aksyon klima (<https://secure.avaaz.org/page/en/>)

PARTI C – PREPARASYON POUR SANZMAN KLIMA



Portre: Noah Jean-Louis

ADAPTASYON AVEK SANZMAN KLIMA

Malgre plizyer pei atraver lemonn i angaze pour esey ralanti sanzman klima, serten sa bann lenpak in deza komans ganny resanti, e plis sanzman pe vini, an rezulta bann emisyon ki deza prezan dan latmosfer. Napa okenn fason kontourn sa – nou bezwen planifye e prepar nou pour bann sanzman ki'n ganny predir pour Sesel. Adaptasyon sanzman klima i enkli gran refleksyon lo sa bann lenpak ki'n ganny predir (war Parti A), e answit desid lo bann stratezi ki nou kapab pran pour evite ki annan bann pert ek domaz konsekan e serye – an sa ki konsern lavi, propriete e lenfrastructure. En lot mo pour sa se PROTEKSYON KONT KLIMA

Adaptasyon avek sanzman klima i zafer tou dimoun- depi bann lakour, bann biznes, bann kominote e gouVERNman. Dan sa seksyon, ou pou konn plis lo serten bann keksoz ki Sesel pe deza fer an preparasyon pour sanzman klima, e kolekte en pe lide pour bann aksyon fitir.

Gouvernman Sesel i okouran ki mannyer sanzman klima pour enpakte nou bann zil, e i pe deza al delavan avek plizyer linisyativ. Annou war detrwa legzanp ...

DEZAS & REDIKSyon RISK

Zesyon Departman Risk ek Dezas (DRDM) ti ganny etabli an 2004, apre Tsounami, pour azir koman en lazans ki pou prepar e planifye pour bann dezas tel ki deboulman later eklinondasyon an rezulta gro lapli. Sa lekip kot Departman Risk ek Dezas (DRDM) i travay tre pros avek Lotorite Meteorolozi Sesel, e se zot ki responsab pour planifye annavans e redwir risk bann domaz an ka en dezas. Zot pe travay pour amelyor bann polisi ek bann plan dirzans, idantifikasiyon e evalyasyon risk, sirveyans e sistèm alert e ledikasyon publik.



PROTEKSYON LAKOT

Departman Lanvironnman i responsab pour trouv fason pour fer fas avek lerozyon lakot e planifye annavans pour okenn logmantasyon fitir dan nivo lanmer. Dan plas konstrir bann striktir kot i nesesit lide plizyer spesyalis, gouVERNman pe rod bann fason pli naturel pour protez ekosistèm lakot (kotye) ki fournir en defans naturel kont tanpet e logmantasyon dan nivo lanmer. Sepandan, dan bann landrwa ki'n deza ganny severman touse, ros ek gro pyedibwa in ganny met an plas pour ede rekonstrir bann lans dan en fason semi naturel. Sa nouvo park lakot ki trouve Ans Lanmous (Anse La Mouche) ek Ans Rwayal (Anse Royale) i bann bon legzanp bann proze restorasyon lakot.


SEKIRITE ALIMANTER

Lazans Agrikol Sesel (SAA) i byen enformen e byen okouran bann risk ki sekirite alimanter Sesel pou fer fas avek an rezulta Sanzman Klima. Zot pe esey entegre lagrikiltir saz e sible dan programm formasyon pour bann zenn fermye, lapes soutenab, marikiltir, zardinaz ek lagrikiltir kot lakour. Zot in osi ede pour met an plas skim lasirans pour bann fermye ek peser, ki ava kapab protez zot kont bann pert an rezulta bann levensman klima ekstrem. Lazans Agrikol Sesel (SAA) pe antreprann resers pour konnen ki kalite prodwi agrikol ki pli adapte avek en klima pli so, e avek bann lefe ki pe arive apre ki delo sale pe filtre dan later pandan ki nivo lanmer pe ogmante.



SEKIRITE DELO

Sesel pe etidye avek swen provizyon delo pour lefitir, e i annan bann proze an plas pour ogmant stokaz delo fre, me osi pour ed bann lakour ek bines pour servi delo dan en fason pli efikas, tel ki GEF Proze Resours Lefikasite (Resource Efficiency Project), (war www.pcusey.sc pour plis detay). I'n ganny rekomande ki bann nouvo konstriksyon i annan en tenk delo, e ranmasaz delo lapli i otman rekomande koman en sours alternativ pour delo non potab, ki kapab ganny servi pour aroz zarden e dan twalet. PUC pe envestir dan amelyorasyon rezo distribisyon delo trete pour redwir kasman tiyo. Distribisyon delo Sesel i komans avek proteksyon e bonn lasante nou bann lafore ek larivyer, ki form parti basen idrografik. Gouvernman pe enplimant en proze « Adaptasyon Ekosistem baze lo Sanzman Klima » e ki fokaliz lo amelyorasyon sekirite delo, e met an plas en nomm Komite Basen Idrografik lo Mae ek Pralen pour antre an kontak avek manm kominote e fermye. War www.pcusey.sc pour plis lenformasyon.



SEKIRITE LENERZI

Sesel pe aktivman promouvwar adopsyon lenerzi renouvlabe e i pe rod bann mwayer pour servi li avec plis lefikasite. PUC, Komisyon Lenerzi Sesel e Divizyon Sanzman Klima & Lenerzi pe kolabore zot tou pour redwir depandans Sesel lo fosil konbistib pour provizyon lenerzi pour elektrisite ek transpor.



LASANTE

Minister Lasante i annan en Plandaksyon Adaptasyon Sanzman Klima ek Lasante Nasyonal Sesel (Seychelles National Climate Change and Health Adaptation Plan of Action), (2014-2018) ki souliny sa bezwen pour resers, planifikasyon ek repons pour problem lasante ki lye avec sanzman klima.

RESERS

Planifye annavans e an mazinan ki mannyer Sesel i kapab pli byen adapte avek



sanzman klima i nesesit en resers byen kalkile e byen atantif dan inovasyon nouvo fason fer keksoz. Liniversite Sesel ek Lenstiti Nasyonal pour Lasyans, teknolozi e Inovasyon in tou le de ganny met an plas pour vin bann sant resers ek ledikasyon pour klima, an kolaborasyon avek bann lezot partener resers lokal e internasional.

AZANDA ADAPTASYON SANZMAN KLIMA ...

Preparasyon pour sanzman klima pa responsabilite gouvernman selman. Bann biznes dan Sesel zot devret osi pe komans planifye annavans e investir dan fitir proteksyon klima. Zot kapab fer sa dan de fason : ofer bann servis pour ed lezot prepar pour sanzman klima, e answit proteksyon klima pour zot prop biznes.

Bann biznes ki Kapab ed ou :



Fourniser tenk delo – plizyer laboutik ki vann lobze an metal ek biznes fayberglas dan Sesel i vann bann tenk delo plizyer grander, e en lakonpannyen (Aquaglass) i spesyaliz lokalman dan tenk plastik. Osi, soutenabilite pour Sesel i vann bann barik ki kapab reganny servi koman tenk delo a en pri tre ba (www.s4seychelles.com).

Fourniser Pano Soler Voltaik – I annan detrwa fourniser ek enstalater pano soler voltaik lokal, ki kapab konsey bann lakour ek biznes lo benefis pano soler voltaik. Sak dimoun ki enstal pano soler voltaik pe ed Sesel vin mwen depandan lo lenportasyon fosil konbistib. Si ou anvi ganny en lalis sa bann biznes, al lo sa sit web: www.pvproject.sc.

Peser ek fermye lokal – Sa bann dimoun pe ed Sesel redwir son depandans lo manze enporte e fournir bann prodwi lokal ki fre pour bann lakour ek lezot biznes. Etan pli otosifizan kot i konsern manze nou pa pou tro ganny afekte ler lasesres ouswa linondasyon i frap bann lezot pei ki pe aktyelman eksport manze Sesel.

Arsitek – Plizyer arsitek lokal i byen talante dan fason pour protez klima pour ou lakaz ouswa landrwa biznes kont gro lapli, linondasyon, tanperatir o e lezot lenpak sanzman klima – demann led si ou bezwen, ouswa kontakte soutenabilite pour Sesel (S4S) e nou ava rekomann en dimoun pour ou.

Ki mannyer ou kapab protez ou biznes klima?

- Bann lotel ek pansyona (guest houses) ki sitye o bor lakot ouswa o bor en larivyer i bezwen evalye zot risk an ka i annan ogmantasyon dan nivo lanmer ouswa linondasyon. Minister Tourizm i fourni gidans pour preparasyon dezas ek plan pour zesyon risk e i kapab ed ou idantifye bann risk ki asosye avek sanzman klima.
- Pour okenn biznes ki trouve lo lakot e ki ankor dan faz planifikasyon, konstrir lo pilye ki en fason konstriksyon ki ti pratike oparavan, i en bon fason pour evit linondasyon e lanmer mont. I osi enportan pour gard din ek rivaz (riverbank) ekolozik avek vezetasyon naturel ki ava fourni en proteksyon pour ou.
- Mazin lo ou sekirite lenerzi ek delo – bouz lo pano soler voltaik an fezan sir ou annan lezot sours delo alternativ ki an sekirite e sifizaman tenk delo i de mwayen pour vin pli otosifizan.
- Bann restoran i devret pe komans konsider enkli plis bann manze ki zot kapab ganny lokalman lo zot meni, e met an plas en pti zarden si lespas i disponib. Swazir pwason ki annabondans lo marse lokal tel ki makro, karang olye fye lo bann tel ki bourzwa son stok pe diminyen.
- Bann loperasyon koule i kapab enkorpor bann tour lo bann resif ki'n degrade e ki'n sibir blansisaz pour ansenny zot kliyan lo ki mannyer sanzman klima i enpakte lo bann resif. Kolabor avek en Lorganizasyon Non Gouvernmantal (NGO) lokal ki pe travay lo restorasyon resif lo lakot e ankouraz ou bann kliyan pour partisip dan restorasyon bann resif.



(Zimaz: agos GVI Sesel, lo drwat S4S)

SOSYETE SIVIL EK ADAPTASYON SANZMAN

Bokou lenpak sanzman klima pou ganny resanti dan kominote, lo later. I annan plizy whole organizasyon ki pe esey anmenn dimoun ansanm pour planifie annavans e adres lerozyon lakot, linondasyon e lezot bann defi. La detrwa legzanp:

Lasosyasyon Fermye Valdandor

Sa group fermye pe travay ansanm pour plis ki 20 an pour promouwar bann pratik lagrikiltir soutenab ek manze lokal. Swiv zot programm 'Manze Dan Leo' dan Sant Kominoter Valdandor sak Oktob.



Zimaz: Nation Sesel.

Komite Basen Idrografik Kominoter

I annan plizy whole sa bann group an plas e ki pe fonksyonnen deza pour ede protez bann basen idrografik pour asir provizyon delo pour bann laferme bann lezot litilizater lokal. Zot ti demare anba proze gouvernman sanzman klima EBA, me zot endependan, pasyonnen e pare pour fer en diferans dan zot kominote.

Avangard Ans Kerlan

En group vwazen Ans Kerlan, Praslen, in zwenn ansanm pour lit kont lerozyon lakot lo zot propriete. Bokou parmi sa bann manm in perdi plizy whole met kare later e zot pe aprezan esey remet bann ros ek lezot mezir pour anpes plis lerozyon.

Klib lanvironnman Port Glaud

Sa group kominoter in aktiv depi 2010, e zot pe travay an partenaria avec Ephelia Resort, Soutenabilite pour Sesel e Minister Lanvironnman pour protez e amelyor marekaz mangliye ki protez zot lakot kont lerozyon. Zot in plant mangliye, fer gran netwayaz e plizy whole aktivite edikasyonnel pour tou laz, pour ed zot konn plis lo lenportans mangliye dan proteksyon lakot.



Zimaz: S4S ek klib lanvironnman Port Glaud.

ADAPTASYON KOT LAKOUR- KI NOU KAPAB FER?

Bon nouvel pour tou Seselwa se ki plizyer stratezi pour adaptasyon sanzman klima kot lakour i anliny avek bann pratik kiltirel lokal. La enn de keksoz ki ou kapab eseye (ouswa si ou deza pe pratik zot, felisitasyon, kontinyen).

Prodwir ou prop manze

- Ki swa ou reste dan en lakaz ouswa en apartman, ou kapab prodwir ou prop manze pour ekonomiz larzan e vin pli an sekirite kot manze i konsernen.
- Esey plant prodwi agrikol ki pouz fasilman e ki pa siseptib pour atir pest.
- Servi kontrol pest naturel (tel ki servi delo ek prodwi ki lav lasyet avek) ouswa an touyan pinez manyelman.
- Servi konpos ouswa lezot fimyen naturel pour en meyer rekolt.
- Demann konsey ek legren avek ou vwazen, e partaz ou rekolt.
- Aroz ou zarden avek delo lapli!



Adopte stil ek larsitektir tradisyonnell.

- Konstrir lakaz lo pilye o bor lakot i en bon nide. Elev fondasyon lakaz par lao later i gard zot an sekirite kont bann linondasyon okazyonnell e, i permet ler sirkile e gard lakaz pli fre!
- Bann vye lafnet anbwa avek lanm ouswa menm enn an vit, ava permet ou kontrol mouvman ler. Sa bann kalite lafnet i ede gard ou lakaz fre naturelman e aere.
- En gran lavarang i ideal pour viv dan en landrwa tropikal. En lavarang ki'n ganny byen konstrir i kapab vin en landrwa naturelman fre e byen aere dan ou lakaz, pour ou repoze, antretenir, e menm pran dinen.

Asire ou annan bon provizyon delo

- Enstal en tenk pour stokaz delo trete PUC an ka rasyonnman.
- Met an plas ou prop sistem stokaz delo lapli ouswa delo larivyer e servi sa koman en alternativ ouswa rezerv dan letan rasyonnman.
- Servi byen delo pour ed pei kontrol e zer nou resours delo pli byen.



Prepar ou propriete an ka gro lapli

- Plis lapli i definitivman lo previzyon pour lavenir Sesel, alors i meyer ki ou aisre ou annan en bon sistenn ranmasaz, stokaz ouswa dispozisyon delo lapli an plas.
- Enstal dalo lo ou lakaz pour anmas delo lapli pour drenaz ouswa stokaz.
- Netway dalo regilyerman pour evite ki i bloke avek fey ouswa lezot debri.
- Stok delo lapli ki an akse dan en landrwa kot i an sekirite e ki ou kapab servi sa delo apre, par egzanp dan ou zarden.

Enspekte landrwa pour risk deboulir later

- Si ou propriete i lo montanny, enspekte landrwa par lao e par anba ou lakaz pour risk deboulir later ouswa bann ros ki kapab tonbe.
- Asir ki tou miray in ganny konstrir dan en fason profesyonnel, e ki i annakor avek direktiv planing.
- Enspekte bim ou lakaz ek miray regilyerman pour war si zot pa pe afeblir, e fer reparasyon si e kan i neseser.
- Si ou pe fer en nouveau konstruksyon lo montanny, evite koup lateras me plito esey konstrir lo pilye.



Otan ki later pa ganny deranze, risk deboulir later i minim.

- Si ou trakase e ou pa asire ki pou fer, telefonn zesyon Departman Risk ek Dezas pour plis konsey.

Tay bann gran pyedibwa o bor lakaz

- Dan ka gro divan tay bann gro pyedibwa o bor lakaz pour evite ki bann brans i tonm lo lakaz e koz domaz.
- Fer menm zafer avek bann pyedibwa ki kapab andomaz lakaz ou vwazen.

Plant pyedibwa Ki donn lonbraz o bor lakaz

- Fer byen atansyon risk bann brans pyedibwa ki kapab tonbe, bann gran pyedibwa ki donn lonbraz ava ede gard ou lakaz fre naturelman.
- Reflesir byen lo landrwa kot ou plante (pour blok soley) e ki kalite plant ki pli apropiye pour ou propriete.

Gard ou zarden ek son zalantour prop

- Gard bann vye tol ek lezot bout metal otour ou propriete an sekirite. An ka gro divan, sa bann keksoz i kapab anvole e bles en dimoun.
- Pa gard okenn salte, vye larou ouswa nenport lezot keksoz dan ou zarden ki kapab retenir delo ek moustik.

Mazin de fwa

- Aret en moman e reflesir si ou vreman bezwen en kor ouswa en nouveau kannson. Eski in ganny fer avek fib naturel ouswa fib sentetik? Fib naturel i pli soutenab. Tou fabrik i servi en gran kantite resours avan zot ganny prodwir alor resikle kan e ler i posib.

BANN TEKNOLOZI PROTEKSYON KONT KLIMA: SEMEN POUR LAVENIR

Proteksyon kont klima i vedir protez nou fason viv e nou lenfrastruktur kont bann lenpak sanzman klima. Lobzektif Sesel se pour li vin en pei soutenab – en landrwa kot i annan en balans ant proteksyon lanvironnman, annan en lekonomi vibran, e asire ki sosyete i an bonn sante e ere. Pour akonplir sa, konesans ki sanzman klima pe deza afekte nou bann zil, nou bezwen planifie delavan e mazin vreman byen lo bann meyer teknolozi ek stratezi pour met an plas pour asir en lavenir soutenab.

Bann teknolozi proteksyon kont klima i sa bann ki pou ed nou reziste sanzman klima. Zot pa neseserman bezwen bann teknolozi sofistike, ser, menm si dan serten ka zot bezwen ki nou investir ladan ozordi pour protez nou lenerzi, delo ek sekirite alimanter kont bann domaz fitir ouswa defi. La enn de legzanp pour teknolozi proteksyon kont klima apropriye pour bann zil parey sa ki pour nou:

Bann Striktir defans lakot

Sa i kapab bann striktir dir parey miray delosale ouswa bann striktir mou parey protez e replant mangliye lo lakot, ouswa meyer ankor, en kombinezon inovativ tou le de, tel ki resif koray naturel/artifisyal pour protez lans disab kont aksyon laroul ek lerozyon.




Zimaz: Lazans Nouvel Sesel (Seychelles News Agency)

Konstriksyon par lao nivo lanmer pou osi protez bann lenfrastruktur tel ki bann semen, batiman, pon, langar pour stokaz manze, batiman e fer nou vin pli rezilyan dan letan gro lapli ouswa tanpet.

Gard Lafreser

Met an plas bann standar konstriksyon ki gard bann batiman pli fre e redwir bezwen pour erkonn ki ava ed nou reste confortab menm letan tanperatir i ogmante. Sa i enkli izolasyon pour miray ek twatir, e bann lafnet terni spesyal, lafnet avek lanm e louverz ki ava anpes lasaler soley (get desen)



BANN TEKNOLOZI PROTEKSYON KONT KLIMAN: SEMEN POUR LAVENIR

Laferm proteksyon kont klima


Serten laferm pe deza servi metod irigasyon ki redwir gaspiyaz delo e maksimiz delo kot rasin bann plant la kot zot bezwen. Zot pe osi bouz lo prodwi agrikol ki adapte pli byen avek bann kondisyon sanzman. Senpleman azout en pe laponp vreman efikas, en pano soler pour donn plis pouvwar bann laponp, bann lasanm lafreser e ou pou ganny ou laferm proteksyon kont klima!

Rezo elektrik entelizan

Sa rezo bann kab ki konekt stasyon kouran avek bann itilizater elektrisite i apel en rezo eletrik entelizan. En rezo i en rezo ki fleksib, ki kapab ganny fournir par plizyer sours lenerzi ki etale dan diferan lokasyon e redistribye sa lenerzi fasilman pour asire ki napa sirsarz. Sa rezo i osi permet sa zofisyé ki responsab sa rezo(kot PUC) pour imedyatman lokaliz problemm e ferm en landrwa spesifik si en problemm in ganny detekte (legzanp: gro divan ouswa linondasyon lekipman). An plis ki sa, an metan bann kab elektrisite dan bann lankadreman enpermeab anba later i protez sistem kont koupir kouran an rezulta pyedibwa tonbe pandan gro divan. Sa rezo i osi fer li fasil pour bann konsomater gard rikord son lizaz litilite lenerzi.

SMART GRID

A vision for the future — a network of integrated microgrids that can monitor and heal itself.



zimaz: <http://viterbiovoices.usc.edu/wp-content/uploads/2012/10/smartgrid.jpg>

Sa livre i zis en l'entrodiksyon bref lo sanzman klima pour bann sitwayen Sesel. I annan bokou plis pour aprann e konnen, e nou swete ki sa livre ava enspir ou pour kontinyen aprann! Dan sa seksyon, ou kapab trouv en lalis bann sitweb e dokiman, parmi plizyèr ki'n ganny servi pour fer konpilasyon sa gid. Bon lektir!



SITWEB INTERNASYONAL ESANSYEL

350.org En platform anliny pour kordin aksyon global pour met en lafen avek lizaz fosil konbistib. <http://350.org/>

Aklimatize: En sitweb ki base an UK ki annan lenformasyon ek resours lo adaptasyon sanzman klima dan diferan pei. <http://www.acclimatise.uk.com/>
EDGAR (Detabes Emision pour Resers Atmospherik Global)

:<http://edgar.jrc.ec.europa.eu/>

GRIST.Nouvel lo lanvironNman e sanzman klima anliny baze Rwayonm-Ini.<http://grist.org/>

Gardyen. En jurnal ki trouve anliny Leta-z-Ini.
<https://www.theguardian.com/uk/environment>

IPCC (Pano entergouvernmantal lo sanzman klima):<http://www.ipcc.ch/>

NOAA(Osyanografik Nasyonal e Administrasyon Atmosferik - USA):<http://www.noaa.gov/>

UNFCCC (Kad konvansyon Leta- z -Ini lo sanzman klima):<http://unfccc.int/2860.php>

UN Platform Konesans Developman Soutenab pour SDG'S. Link to Goal 13 Aksyon Klima

<https://sustainabledevelopment.un.org/sdg13>

DOKIMAN ITIL:

Gouvernman Sesel (2015). Seychelles' Intended Nationally Determined Contributions (INDC) under the UNFCCC.

Disponib kot:

<http://www4.unfccc.int/Submission/INDC/Published%20Documents/Seychelles/1/INDC%20of%20Seychelles.pdf>

Gouvernman Sesel (2010). Polisi Lenerzi Sesel. Disponib kot:

<http://www.ie.a.org/policiesandmeasures/pams/seychelles/name.37155.en.php>

Gouvernman Sesel (2009) Stratezi Nasyonal Sanzman Klima Sesel.

Disponib kot:

http://www.preventionweb.net/files/20091100_seychelles_climate_strategy_2009.pdf

Lalwa Sesel – disponib anliny kot

<https://seylili.org/commons>

LORGANIZASYON:

Zesyon Divizyon Risk ek Dezas pour Sesel: <http://www.drdm.gov.sc/hotline:2522622>

Minister lanvironman, Lenerzi e Sanzman Klima Zarden Botanik Mon Fleri, Mae <http://meecc.seydevplus.com/> Tel. 467-0500info@env.gov.sc

Younit Kordinasyon Proze. Sa younit anba Minister Lanvironman, Lenerzi e sanzman Klima i kordin proze GEF ek UNDP e i annan plizyer rapor enportan e lezot publikasyon relye avek sanzman klima lo zot sitweb.<http://pcusey.sc/>

Korperasyon Litilite Piblik. Sa lorganizasyon parastatal i responsab pour fournir elektrisite e delo trete lo tou le trwa zil prensipal pour tou piblik. <http://www.puc.sc/>

Lenerzi Komisyen Sesel, i responsab pour regulariz sekter lenerzi e edik piblik lo konservasyon lenerzi, lefikasite e lenerzi renouvlab.<http://www.sec.sc/>

Lazans Meteolozi Nasjonal Sesel. Sa lazans i responsab pour kolekte e analiz data klima tel ki logmantasyon dan nivo lanmer, lapli, ler e tanperatir sifras lanmer. <http://www.meteo.gov.sc/>. Tel. 438-4358

Soutenabilite pour Sesel – Lorganizasyon Non Gouvernmantal
i fokaliz lo lavi soutenab e devlopman soutenab,www.s4seychelles.com

SYAH Sesel - Lorganizasyon Non Gouvernmantal lazenes i fokaliz lo devlopman soutenab,<http://syah-seychelles.weebly.com/>

Liniversite Sesel- Programm Lasyans Environnmental e bann lenstiti resers pe zot tou analiz bann diferan laspe sanzman klima, www.unisey.ac.sc

NOTES

NOTES



sustainability for seychelles

Sa Gid Sitwayen pour Sanzman Klima in prodwi par soutenabilite pour Sesel, en lorganizasyon non governmantal ki son misyon I promot lavi soutenab Sesel. Nou apresye bokou sipor nou bann finansye, ki enkli Komite Nasyonal Sanzman Klima (National Climate Change Committee)/ Governman Sesel, Linyon Eropeen (EU), Konservasyon Sesel e Fon Adaptasyon Klima) Seychelles Conservation and Climate Adaptation Trust (SeyCCAT) e Laliants Global pour Sanzman Klima (Global Climate Change Alliance).

info@s4seychelles.com
+248 2519135 or +248 4224072
www.s4seychelles.com

